

**Center for Cybersikkerhed (internetikkut isumannaassuseq) pillugu inatsisip Kunngip peqqussutaatigut Kalaallit Nunaannut atuutsinneqalernissaanut Inatsisartut aalajangiussassatut siunnersuutaa Kalaallit Nunaanni Namminersorlutik Oqartussanit akuerineqassasoq**

(Ilinniartitaanermut, Kultureqarnermut Ilageeqarnermullu Naalakkersuisoq)

## **Saqqummiussissut**

### **Siullermeerinnineq**

Center for Cybersikkerhed pillugu inatsit nr. 713, 25. juni 2014-imeersoq kingusinnerusukkut allannguuteqartoq Folketingimit akuersissutigineqarpoq. Inatsisip allannguutaa kingulleq 1. juli 2019-imi atulersinneqarpoq. Inatsit Kalaallit Nunaannut atuutinngilaq, kisianni Kalaallit Nunaanni pissutsinut naleqquttunngorlugit Kunngip peqqussutaatigut tamakkiisumik imaluunniit ilaannakortumik atuutsinneqalersinnaavoq.

Nunami digitalinngorsagaasumi qarasaasiaqarnikkut illersugaanerup siooranartoqartuarnera Kalaallit Nunaani atugassaalersimasoq Naalagaaffiup illersornissaqarfiata isortortumik paasiniaasartuisa - Forsvarets Efterretningstjeneste-p nalilerpaa.

Issittup aamma Kalaallit Nunaata soqutigineqarnera annertusiartortillugu nalilerneqarpoq qarasaasiaqarnikkut it-mik aaqqissuussinitta saassunneqarsinnaanera annertusiartorsinnaasoq. Illersornissaqarfiup isertortumik paasiniaasartuisa nalunaarusiaat ”Efterretningsmæssig Risikovurdering 2019” Issittoq siullermeersumik aarlerinaateqarfiusuni sallahannorsimavoq. Aarlerinaateqarfiusunik nalilersuinermi allaaserineqarpoq naalagaaffiit pissaanilissuit Issittumi pissaaneqarniunnerat. Naalagaaffinnut pissaanilissuarnut ataasiakkaanut tunngatillugu sammeneqarput taakkua Kalaallit Nunaanni qanoq soqutiginninneri, aammalu nunanik allanik sunniinartarnermini ileqqulersuutigisartagaat. Naalagaaffiup illersornissaqarfiata isortortumik paasiniaasartuisali takussutissaqartinngilaat naalagaaffiit pissaanilissuit maannamut Danmark-imik imaluunniit Kalaallit Nunaannik sunniinarsimasinnaaneri.

Siunnersuut tassaavoq atortuulersitsineq sammisat aappaannik Sillimaniarneq aamma inuinnartut inuuneq pillugit, Digitaliseeriinermut Periusissiami 2018 – 2020-imeersumi. Tassani aalajangersarneqarpoq inatsimmik pilersitsisoqarnissaa tunngaviusussamik paasissutissiisarnarup nukittorsarneqarlunilu qaffasissuunissaanik, paasissutissiisarnikkut attaveqatigiinnikkullu teknologiimik atortulersuusersornermi, aammalu pilersitsinissaq paasissutissiisarnarup attaveqatigiinnermullu ingerlatsivimmik immikkoortumik suliassanik pineqartunik isumaginnittussamik.

Aalajangiiffigisassatut siunnersuutikkut matumuuna Naalackersuisut kissaatigaat nukittorsaanissaq qarasaasiaqarnikkut aamma paasissutissiisarnikkut inuiaqatigiinni kalaallini suliniutinik qaffasissusilimmik aaqqissugaasunik.

Aammattaaq Naalackersuisut kissaatigaat nukittorsaasoqassasoq qarasaasiaqarnikkut paasissutissaatillu illersorneqarnerini, aamma inunnut tunngasunik paasissutissaatitta Naalackersuisut allaffissornikkut ingerlatsiviisigut innuttaasunut aamma suliffeqarfinnut tunngatillugu katersorneqartartut eqqarsaatigalugit.

Taamatut oqaaseqarlunga aalajangiiffigisassatut siunnersuut Inatsisartunut akuersaartumik suliassanngorlugu tunniuppara.